
Erennerung

En grüße „Gaist“ hat mol geschriwwe:
Erennerung — es dat Paradies —
aus dämm dä Mensch nie wierd vertriwwe!
Wat mer vergißt — wor maistens fies.

Dat wierd sich Gott sei Dank nie ännere,
wat scheen wor, setzt em Herz sich fest.
Och ich dohn mich noch geer erennere —
an 't dreifach Jubiläumsfest!

Et schiene wärklich „siwwe Sonne“
am 12. August vorig Johr
on trotzdämm hat sich engefonne,
fast alles, wat gelade wor.

Se kohme en de beste „Brocke“
met Schachtele on Breefomschlag.
Die „Eule“ konnte echt fruhlocke —
an ihrem grüße Ehredaach!

Noh Gleckwonsch — scheene Dankesrede,
do ging et ierscht su richdisch loß.
Et wor dä Fruhsinn och vertrete —
dat Jubiläum wurd begoß.

On als dä Maache hat gegrummelt,
han mir ons all ganz hemmungsfrei
am „kalte Büffee“ rom gedummelt,
wie en dämm Lied von „Rainhard May“!

Katharina Schaaf
Juli 1991